

嵩

書

嵩書卷之十五

韻始篇四

大明

洪武至隆慶年詩

五言古詩

詠隱逸二首

高啓

戶部侍郎

武攸緒

孽后移寶鼎同姓咸析珪獨去謝親寵龍門事冥棲
澹泊如素嘗衣褐復茹藜賜器不肯御牀頭委塵泥
族人豈不華回首已粉齏苟榮禍必集達識乃弗迷

蟬蛻衆濁中名與嵩高齊

盧鴻

顥然守泰一高卧在幽壤開元始求治賢哲寧夢想
詔書起巖局宸意勤挹仰入京遽還山孰得磨以鞅
天子遂其高營室致安養爵祿不可加貪士應泚顥
別盧巖

厲仲彰

洛陽知縣

愛山有溪癖况此丘壑美高韻拔風塵一見如知已
秀色聳遐觀清聲洗凡耳久住嗟未能回首情無已
黑石渡

于範

山足縈清波渡頭枕黑石野花學菊黃山果如丹赤
高岸穿林過溪溝落葉集雲靜正秋空出門雙眼碧

登崑崙望少室山

王堯弼

赤日登崑崙薰風自南來滌彼溽暑退吹我衣裳開
我懷覺清灑我行寔徘徊節彼少室山峰巒鬱崔嵬
白雲鎖其巔蒼松盤其隈芙蓉接漢出罨畫倚天排
不說神仙事雲霞亦奇哉平生愛山水此興詎能灰
仰止意不盡日夕還登臺何如凌絕頂憑高瞰九垓

過望嵩

陳棐

中書舍人

遠岫倚天高望入碧雲際白鶴駕吹笙仙人去千歲
孤標二室尊四嶽群峰細欲赴小山招幽巖結叢桂
渡伊洛望嶽

吳三樂

大理寺卿

端居厭俗紛逸興懷林莽勝景標靈山秀拔中天敞
二室最奇絕芙蓉似仙掌取號寄吾生雲壑空遐想
佳辰留朱明積雨何蕭爽驅車渡伊洛霽景晨曦朗
祥飈鼓蘭橈素波時滉瀟逝流一以眺川原脩且廣
沙浦多芳林好鳥遞清響欲濟且踟躕水木坐俯仰
丹嶂尚冥濛倏忽煙雲盪風磴掛飛泉中有叢桂長

睠彼山中人，薜衣閒蘿幌。子晉從浮丘，出入緱山上。
携手有良朋，稅駕願長往。枕石採芝苓，餐霞吸瀨沆。
行行近山阿，去去出塵壤。夙心今已諧，明發恣幽賞。

嵩陽宮觀漢栢

楊家相

河南巡按御史

受命巡中土，攬轡日駸駸。汝南初訖事，飛蓋指嵩岑。
迺邇來登封，厥邑幽以深。鬱鬱嵩陽宮，宛在城北林。
穹碑紀唐事，靈應俱銷沈。階前存古栢，圍大踰五尋。
歲月歷千齡，老幹何森森。龍鱗時剝落，風雨長哀吟。
我來躡芳境，坐玩開塵襟。因嗟梁棟材，乃在煙霞潏。

盤桓不能去歲晚結同心

崇福宮禱雨

李禎

河南左布政使

清曉戒徒御禱雨謁道宮
焚香古像前拜跪肅以恭
因之感興亡華構久已空
尚有勅撰碑狼籍蔓草中
慨想宋全盛鑾輿屢遊從
名臣領祠職列辟嚴睟容
連往物隨改偉觀難再逢
登臨睇煙霞頗愜眺望踪
遲回不能去樹杪來長風

辛亥端午日遊少林寺示檜菴班上人

李禎

少林聳岩堯有路達蔥嶺半生懷勝槩老得踐真境
縑流遠見迓偏袒仍露頂升高縱遐觀頗覺癡緣屏
蒲風翻卷帙艾色侵衣領摩挲前代碑文詞極嚴整
掇蔬僧具供飲騎童汲井自拈清淨香作禮藝古鼎
超超昔神師順寂同溟滓而於片石上留此不滅影
竺夏雖異轍皆貴能猛省閒雲許分坐禪定畢餘景

登嵩山

吳會

茲嶽冠神區方中環四維煙霞晨夕幻曜靈東西馳
群峰萬古石芳樹千年枝山駐周王駿途經漢帝輜

空巖答清嘯豈異三呼時澹澹秋日光漠漠寒雲移
悲風振柯條百草無威蕤孤征感節變惆恍臨路岐
迴瞻北邙道爲味遊仙詩子晉去不復浮丘杳難追
何當從之遊服食恒在斯

天中閣醉後俚語呈鄭明府

金一陽

我登嵩之巔萬壑白雲連不知天路近忽覺有神仙
神仙仙令才携手登蓬萊一醉天中閣四望可徘徊
徘徊來松風拂我客塵衷歌笑情不極彷彿超樊籠

七言古詩

咏王子喬

劉基

誠意伯謚文成

王子喬乃是皇王之子賢聖之孫
深宮洞房不稱意却駕白鶴尋
軒轅虹霓爲旗雲爲旛飄然乘風上崑崙
王子喬去何之朝發暘谷暮崦嵫
六龍九鳳相追隨穆王西上不得
王母訣胡爲元氣獨爾私王子喬
去不還社稷功業巍如山猶見九
鼎之神姦王城日夕生茆菅爾獨
胡爲白雲間王子喬空長歎

遊少林寺

劉咸

河南按察僉事

嘗讀古人詩知有少林寺十年欲往苦無因今朝始
得遂初志危峰五乳高挿天勢與少室相聯綿青宵
簾幕貫星斗白日窓戶通嵐煙山僧見客喜相迓環
立道傍留駐馬蒼忙延入禪關中殷勤羅拜法堂下
循廊導引看殘碑一一指點談當時崇建祇稱唐宋
盛品題亦識蘇黃奇須臾邀我凌山頂直向懸崖覽
勝景溪邊洗鉢汲清泉澗底拾薪煮香茗爲言此山
稱法窩開創緣自僧跋跢一從藏經入中國築臺繹
字功居多後來達磨方卓錫九年此中坐面壁功成

隻履向西歸尚遺靈影在山石當時慧可皈依溪斷
臂立雪求安心燈燈繼續幾千載妙法相傳猶至今
從容問答未及已忽聽蕭颼松風起層巖徙倚重徘徊
但覺煩襟清似洗歸來幽興殊未闌還登鐘閣窮遐
觀凭欄獨立久延佇置身恍在青雲端大雄殿西
古輪藏金碧熒煌屹相向月下平分寶塔陰空中每
接仙韶響吁嗟好山真可居公程促迫將何如平生
塵土滿胸臆安能爲我俱消除出門別僧僧送罷又
復回顧與僧話他年優詔許歸田準擬相尋結蓮社

少林行

沈文華

河南府知府

鬼鑿山空風滿窟御砦峰高寒瀉玉憑虛不覺天宇
低彷彿青雲礙雙足泉飛六月侵人肌石迸新芽薦
山藪少林勝槩冠中州黃鳥流音花繡谷不因省歛
來此遊誰削芙蓉洗塵目山僧那識長官心錯把笙
簧奏新曲村翁牧子傍我車爭欲褰帷話風俗溫言
慰藉良再三重惜我民貧切骨臨風感慨不成吟日
落山溪聲振木

嵩陽宮三栢歌

沈文華

蒼龍蜿蜒潛淡淵一飛直上嵩之巔須臾雲雨遍八
極歸來排立宮之前神物從來變化速頭角崢嶸鱗
甲綠長髯鼓動清風生世人錯認栢爲骨漢武當年
重遠遊旌幢五色翳山頭嵩呼萬歲效三祝聲飛千
古遵遺猷惟有將軍心素赤鐵面生寒光射日高標
豈肯伍凡材矢與皇家爲柱石我來再拜嵩陽宮欲
祈哀我民疲癯將軍不惜鞭龍雨我土崇臺帟榭千
秋報祀無終窮

三將軍古栢歌

陳棐

昔摩東嶽大夫松今觀中嶽將軍栢偃蓋影走老蛟
青怒濤聲瀉寒空碧扶疎掩映嵩陽宮仙蹕曾經漢
武封溜雨霜皮合六抱凌霄秀色敵群峰嵩峰靈氣
來千古神降生申應生甫英賢鍾毓應人文遺靈孕
出將軍武尚父八十舊鷹揚方叔元老總戎行此栢
正同三代將豈爾秦漢可比量貞心早際風雲會勁
節曾依日月光龍虎踞蟠稱得地麒麟殿閣待傳芳
老來閒退嵩山前顏色蒼古風韻全金鎖綠沈拋暮
景淡巖靜壑得遐年君不見三鶴峰滿山明月鶴無

蹤又不見三花樹花落秋風不知數惟有將軍三柘
幾千秋壽過子晉邁浮丘將軍將軍天下稀才大真
成與用違誰能移置廟堂上莫使風霜冷鐵衣

登嵩山

駱顥

放歌今幸游嵩山懸崖千仞初躋攀浮丘子晉在何
處祇見白雲時往還石牀洞口處處有青壁截斷仙
人關飄然便欲凌汗漫俯視八表空人寰塵緣未盡
恣幽探捫蘿豈惜徒步艱穿雲回首葛衣濕林端香
氣芬幽蘭轉松移岫坐超忽遙聞流水聲潺潺山高

水遠望不極長風飛雨來山間枕璞難得遇金漿堪
駐顏王室儻名列願乞長生丹舉首一笑出塵網不
老渾令歲月閒

遊少林吟

馮世寧

登封教諭

罡風吹衣山霧黃松筠遶遶身欲僵攀緣石磴險不
上舉頭還有青林岡雲霞遠鎖達磨寺中有山堂說
偈事蒼松偃蹇虬龍形石上篆成霹靂字江濤浪擁
摘蘆來西域曾踏青蓮臺一朝老坐少林石五乳山
峰生紫苔山中秋月明如鏡山下清泉流不盡禪心

如月復如泉野壑禽聲天宇淨偶來此地一遨遊登
臨直上山之頭雲林杳杳奇如畫恍若三島與十洲
鳳聲不聞仙已泯掩靄雲山真列看千崖掃石看名
詩古字蒼苔如虬蚓

嵩山高

吳三樂

望嵩嶽兮乃在伊洛之浦箕穎之隈龍從萬仞何奇
哉盤礴中原橫九垓陰陽昏曉多變態吐吞日月相
縈迴翠屏孤聳排丹嶂二室東西宛相向諸峰却立
如欲摧削出芙蓉千萬狀紫峰高處從中起瑤臺紺

宇白雲裡古松偃蹇不知年溪流惟見石齒齒遙接
崑崙巔下看扶桑水天際長河一線來鯨掀鰲掣勢
難止日觀蓮峰稱最高嵬乎泰華未足恃有峰六十
信挿天森森劍戟自蜿蜒王女青童遞隱見紫微黃
蓋生雲煙上有三花之古樹下有百丈之飛泉晴空
片片灑寒雪飛蘿懸瀉如珠連我欲乘風到絕嶺恨
無羽翰愁攀緣策杖徘徊日將午倏忽陰雷散輕雨
長風爲我捲浮雲飛來倒掛巖前樹振衣宛轉陟層
巔四顧茫茫小寰宇神僧面壁人不知仙子吹笙鶴

自舞即欲舉手探月窟廣寒彷彿見銀闕醉把金壺
餐綺霞坐看玉鏡邀明月入石室卧雲門那知身外
有乾坤劃然長嘯如雷奔萬壑雲霾虎豹蹲山鬼倚
巖笑山鳥繞樹喧靈怪恍惚不可測更從何處問真
源君不見周家申甫元非偶詩云嶽降理或有又不
見盧鴻巖下草生春卜居偏傍洗耳人吁嗟乎靈山
自是毓精英古來高士留其名秀色攬結眞堪把而
我豈終軒冕者紅塵白馬竟何爲不如棲息此山下
出山日落迷煙霧回首恐失桃源路他年儻得伴松

筠買山還許留詞賦

解五嶽圖贈少林寺僧洪川廣令歌

陳文燭 大理寺卿

夜坐不厭山中月
晝行不厭山中雲
雲飛月落興無盡
披圖指點尚鬱分
此圖真形號最古
天壤名山惟有五
芙蓉日觀在東南
蓮花仙掌開西土
太行峨峨碧玉間
一到嵩丘是中宇
携來傍我亦有年
何人贈之郭次甫
高僧况是惠遠流
卜居它日誰為主
好勒達磨第一峰
寒林夜半生風雨

嵩丘歌送蔣子雲

薛蕙吏部考功郎中

君不見衡恒泰華奠九州豫州巨鎮名嵩丘中天照
耀白日景后土灌注黃河流往者天皇題寶帙五嶽
真形標第一三花隱映玉女臺二峰羅列仙人室曾
聞軒后駐雲駢復有周儲吟鳳笙緱氏山頭鸞鶴去
鼎湖水上蛟龍迎君看萬乘亦何似古人棄之如脫
躡紛紛流俗笑此言肯把山林易青紫世間萬事俱
零落何用明珠彈鳥雀因嗟季子狹三河轉憶尚平
娛五嶽我今思歸殊未還夢中每每遊仙山頗疑羽

翼落天外但覺烟霧非人間君不見謝公李白神蕭
爽天姥羅浮夢來往予也頻夢山中遊心知自是神
仙流異時最愛安期術擬臥名山采芝術羽化青雲
雖未期肥遯丹崖詎爲失送君南行洛陽道一望嵩
山愁絕倒谿口空餘躑躅花澗中不見菖蒲草薄遊
已自厭風塵多病祇堪學隱淪明年定訪浮丘伯爲
掃雲林作主人

五言律詩

少林寺

閻禹錫

監察御史

梵闕珠林靜
魏魏枕大阿
嵐風當戶擁
鳥韻隔花多
禪室通幽徑
金田長亂莎
山門環洛水
萬籟響清和

周公臺

厲仲彰

周公初建洛
昌運此時開
天子垂衣坐
諸侯執玉來
仁風涵九有
王氣接三台
餘烈今猶在
江山遶廢臺

漢栢

厲仲彰

嵩陽有嘉樹
漢武號將軍
老大空懷寵
孤高自出群

樛枝懸日月老幹挾風雲正合明堂用誰能運斧斤

盧巖寺

孫永思

河南巡按御史

僧笛從雲墮脩脩引露旌翠微涵樹色虛谷應鐘聲
弔古溪山入尋幽仄徑行當門萬竿竹長日引風清
望日遊少林寺

陳棐

夕陽在嶺外林壑已黃昏眞境飛蘭若幽尋入祇園
慧燈明佛界圓月滿空門欲問傳衣法石間幻影存
過少林寺再吟

毛伯溫

兵部尚書

聞道嵩山峻今知天下奇千巖屏障列二室霧雲移

野鶴巢煙樹松風漾石池徘徊爲幽興不覺日西垂

過少林二首

王肅

河南提學副使

披霧縱幽尋頻年說少林到門山雨至遶寺石泉吟
花落中天淨松藏太室深燈龕耿未滅猶自照禪心

其二

草樹連中嶽煙霞帶北邙古禪傳後魏魏碣峙初唐
地僻鯨音壯峰高鶴韻長浮丘招未去夜夜禮名香

會善寺

王肅

青山迂轡至不顧客程遠荏苒惜芳歲留連餘落暉

石同僧貌古泉共梵音微亦有箕山對無人禁采薇

戒壇

王常

兩日登三刹興衰亦漫傷樹交雲榻廢草長石壇荒
乞供朝馴鴿栖禪夜怖狼惟餘茶榜在贏得打碑忙
奉陪巖翁相公遊少林寺二首

薛蕙

吏部考功郎中

久悔凡夫行今參初祖禪山開諸佛界樹換六朝年
聖諦元無法眞空詎有詮不知衣鉢外何物是相傳
其二

少林多老宿祖意若為傳莫學諸方法應參一味禪
真心元寂滅妄想浪攀緣李世須龍象題詩獨慨然
和黃勉之懷嵩嶽詩

王寵

貢士字履吉

嵩山有瑤草白玉如膏流何日攀緱嶺相携卧石樓
吐雲騰斗極飛翠滿神州笙鶴飄颻去青天子晉遊
宿少林寺

許完

監察御史

枕簟逢僧舍孤眠夢亦清山溪雲有脚夜靜雨多聲
欲面九年壁難違寸草情明朝驄馬去猿鶴誤相迎
登五乳峰二首

許完

少室崇朝雨禪房信宿留攀蘿登絕頂倚石酌靈湫
紅粒山椒細蒼煙野樹稠斜陽照林樾何處笛聲幽
其二

五乳峰前路遊人踪跡稀興來成絕賞心醉欲忘歸
斷藥分山髓穿雲破石衣夕陽西壑暝洞主掩柴扉
過登封同吳靜齋遊少林二首

王應期

嵩縣知縣

尋真天路杳駐馬嵩峰尖長嘯驚棲鶴清吟落醉髯
古碑留法界蒼塔挿高簷我欲頻過此能無世俗嫌

其二

鷄鳴苦塵鞅鶴引得幽潛茗碗雲垂脚蔬盤霜割甜
藥欄封土霰芝砌墮窻簾愧我非仙骨相携盡日淹
宿少林

王濤

監察御史

客路紆橫嶺禪堂空碧岑徒參留石影未了獻花心
草澗繁春色松崖倒夕陰焉能無拘束野興逐幽尋
盧巖飛瀑亭

呂顥

河南府通判
歷知府

巖有泉中勝人便景外情雷聲冬不秘雪色夏長生
從好非緣用捐煩豈爲名晚來忘歸徑樵火隔林明

達磨面壁洞

呂顥

古洞攀蘿入淡栖妙獨傳已含石上月不擾鏡中天
冉冉蘆江雪翩翩蔥嶺煙晚參惜未悟結鬱在諸緣

會善寺

任淳

會善何年寺雪菴久得名戒壇花雨散茶榜墨煙橫
雲淨禪窻白山空野殿明荒涼僧跡少幽鳥狎堦鳴

崇福宮流觴亭

任淳

石構池縈曲山腰落細泉流觴浮玉液摘菊點金錢
上界疑無地仙源別有天羈懷成小佇落日未言旋

謁中嶽

王應鵬監察御史

五嶽從中起平生此勝遊
紫雲飛絕頂靈氣溢皇州
日落諸天莫風搖萬木秋
因懷封禪事吟對獨悠悠

崇福宮

王應鵬

涼風吹玉宇吟思獨幽紆
松偃前朝舊泉流太液初
紫雲封瑞檢仙籙發清虛
安得凌霄翼飄飄恣所如

恭祀中嶽

蔡汝楠建撫河南都御史

於赫中州鎮明禋鳳勅宣
河清凝命日嶽順祝禧年
方物蠲常品宮香徹御前
共歡呼萬壽不獨漢時傳

聞劉泗泉袁裕春二丈遊少林未能躬陪杖履
寄此

亢思謙

河南參政

珠林雙轡入春色正平分樹杪懸泉溜旌前擁鹿群
簿書堪笑我杖履阻隨君崖石應題遍寧無一寄聞
宿少林寺同翠巖少參西谷僉憲

鄒守愚

巡撫河南都御史

瑤草香生徑金壘喜得朋良遊非易遇勝景更同登
松下盤飛鶴鐘催入定僧前朝多古跡高塔尚殘燈
少林寺夜懷

趙諫之

登封知縣

樓鐘隔遠遞長夜肅空天月轉鉢峰外僧歸御砦前
揮盃花氣入移榻樹陰偏太室遙相對層嵐飛瑞煙
中嶽廟

趙諫之

高高鎮諸夏四嶽仰岩嶢靈異傳周雅明禋本漢朝
煙雲覆萬里峰巒上層霄我欲求丹訣群仙故寂寥
登封早行

汪泚登封知縣

曉發登封道柴扉盡未開疎林留霧擁野寺傍雲堆
僻壤空桃棗枯禾半草萊深慚時政拙民瘼正憂懷
經行二室望少林未達有作

朱衡

太子太保工部尚書

巡甸初分洛曾經二室中却懷高壁影遙聽少林鐘
老檜春雲滿寒潭夜月空無因陪妙躅行縣儻相從
宿少林寺二首

朱衡

初祖開初地香臺控碧岑雙泉泓德水五葉散珠林
鐘定禪關夕山寒寶塔陰空堂一片月曾印折蘆心
其二

行縣經名刹因風扣梵筵到來諸品靜行處一燈懸
證法何曾法忘緣不離緣焚香持半偈超悟了真詮

宿少林寺二首

吳三樂

看山興不盡且復向禪林
花落空壇暮燈懸古殿陰
翻經貪佛卧聽法伴僧吟
少室悠然趣因窺靜者心
其二

翠屏相對處暝色下殘鐘
谷靜風飄梵窻虛月度松
無生終是夢穩卧已成慵
明日登山意還能杖短筇
雨過會善寺觀茶榜石刻
吳三樂

寺雨人仍過花香酒故隨
尋源行水盡披霧看山時
樹杪聞清磬苔餘認斷碑
虎溪僧送客一笑有相知

九日重遊少林寺

吳三樂

少林佳麗地乘興又重遊
九日禪堂靜千年古洞幽
群山蒼翠合孤峙白雲浮
故友黃花共陶然一醉留
輦洛道中望嵩二首

陸柬

都勻府知府

塵車衝曉霧嶽樹隱寒雲
恍惚三花秀微茫二室分
明霞飛嶂影殘雪綻峰紋
若聽山神語聲聲祝聖君
其二

自古幽棲地經行入望初
仙臺懷對奕靈境慕傳書
樹裏盧巖寺峰前巢父居
何當結茅宇箕穎共樵漁

七言律詩

法王寺

山錫之 登封知縣

一輪松月迥人寰石上藤蘿不可攀
綸氏山川圖畫裏梵王宮殿翠微間
蘭臺護法天龍寂鶴駕吹笙帝子閒
吏隱於斯何獨幸暫遊勝地不知還

過戒壇

曹璉 河南按察僉事

路入嵩陽石磴斜叢林淡處有僧家
松籠雲碓春新穀竹引山泉煮嫩茶
壇下久無人受戒塔前猶見鹿銜花
古碑多是先賢筆鐵畫銀鈎更可嘉

箕陰避暑

傅文

刑部員外郎

獨愛霖林境界幽綠陰蔽日翠光浮棄瓢巖畔排煩
熱洗耳溪邊枕細流每有涼風來樹底更無塵事到
心頭許由巢父今何在千古箕山五月秋

題面壁菴

胡謐

使河南按察副

坐當崖面幾經春悟得安心法更眞歸去曾携棺內
履幻餘猶現石間身泉通靈井龍常蟄草滿荒巖鹿
自馴斷臂已亡門掩雪祖燈相繼復何人

過少林寺

胡謐

嵩嶽西行望少林二師遺跡尚堪尋
法窩弘敞開基遠影壁荒涼歷劫淡
六六奇峰森梵相雙雙靈井印禪心
誰知塵世浮名客也得偷閑一浣襟

少林寺

閻鐸河南左參政

太室西頭第一山達磨習隱舊禪關
足遺隻履傳方外影脫全身在石間
松老欲隨龍化去雲淡長護鶴飛還
諸僧出定門猶掩三十六峰相對閒

遊少林寺

左傑河南參議

西入珠宮別有天偶聞清磬落層巔
香凝蘭蕙薰仙

仗石漱瓊瑤韻野絃白鳥青螭仍護法蒼松翠殿不
知年客心酌罷蓮花水獨向山僧扣秘詮

遊少林寺

段豸 工科給事中

群山突兀白雲深綠樹迷茫覆少林石眼泉香清可
掬岸頭莎輭翠交侵隱君舊價應須減衲子新禪未
易尋坐待晚風涼似洗幾思移榻就松陰

登嵩陽宮遺址併望崇福觀

陳鳳梧 吏部侍郎

山雲閣雨晚氤氲崇福嵩陽兩觀鄰武帝駕臨聞萬

歲將軍栢在歷千春
豁訝巨石橫樵徑
清徹寒潭躍錦鱗
遙望神仙何處覓
天風颯颯灑衣巾

望少林

李夢陽

江西提學副使

三十六峰雲氣通
何峰寺西何者東
林巖霜橫遠亦靜
煙嵐日破重還空
千山盡歷暮轉碧
一樹不落秋能紅
漸聞鐘聲出杳靄
得路誰憐馬僕功

少林寺

李夢陽

林溪谷暝客子入
鐘鳴葉落秋山空
煙雲細裊石澗底
巒岫亂積松
窻中唐碑漢碣
蘚字剥猿啼虎嘯
蘿

燈紅獨坐悠悠息塵想少室影下月出東

宿少林

李夢陽

萬山微暝一鐘鳴古寺溪秋倦客情僧本折蘆翻面
壁人非騎鶴故吹笙寒催亂木風交響白動虛巖月
自生漸愧勞勞不成寐丁丁卧聽早樵聲

春日遊盧巖寺

李居仁

登封知縣

東風隨馬試郊坰吹上蒼茫第幾峰春意綠催前澗
草夕陽紅送半山鐘雲溪石漱千年水寺古龍蟠萬
樹松日暮渾忘歸路遠太平詩酒喜相從

盧巖寺

于範

看罷懸崖瀑布泉
小欄修竹裊晴煙
叢松不礙巖頭
路高岫能侵雲外
天隱士有名從異代
殘碑無字記
當年連鑣有客同
清賞把酒賡歌伐木篇

遊嵩山用薛考功君采韻

喬宇

吏部尚書

五嶽生來有夙期
嵩山登處一何奇
西連太華三峰
影東接扶桑萬里枝
騁步力窮閭闔際
放歌聲振次
寥時茲遊最勝誰
當記恨少琳琅金薤辭

奉陪巖翁相公遊嵩山

薛蕙

壯遊佳節似相期
嵩嶽登高天下奇
策杖俯看鴻鴈影
接離滿插菊花枝
山川俶儻中原地
雲霧蒼茫落日時
勝槩此生能幾遇
尊前醉倒不須辭

登五乳峰

許完

少室山前五乳峰
振衣千仞許誰從
黃河淼淼舒晴練
洛邑微微見蟻封
足縮羊腸迴俗駕
眼空鰲極盪塵胸
乾坤勝地鍾靈異
雲雨時時起蟄龍

盧巖觀瀑

李元

監察御史

絕壑何年掛玉龍
洗心我一問盧鴻
半簾秋雨落天

上十丈白蓮開雪中
潁水風高吹不斷
嵩門月近照全空
縣官更有泉亭約
應許山靈識醉翁

過盧巖觀瀑布

楊儒魯

河南府知府

名山天下半探奇
鳳石龍湫忽在茲
皎日一天飛雨雪
清風雙壑瀉珠璣
浮浮仙洞蘿煙裊
翳翳書臺樹影移
不見當年盧諫議
高山流水動遐思

秋日遊少林

楊儒魯

古林削壁藏金刹
秋色陰崖隱紺城
千樹紅黃千樹碧
一山雲雨一山晴
洞靈猶識胡僧面
天籟如聞子

晉筌踏破紅塵來憩此欲依定影學無生

周公測景臺

王洙

河南按察僉事

周公祠宇尚中天一瓣香燒豈素緣景正嵩陽分曉
暮山宗黃蓋列會玄千年臺照寒空月萬井春餘碧
樹煙制作至今猶想見當時誰賦黍離篇

晚至盧巖

王洙

遠嶼煙光散夕藍幽尋有客問盧巖疎鐘隱約穿林
出古篆迷茫遍石鏡擎蓋蟠松何鬱鬱賤珠飛瀑故
潺潺久居城市逢山快况值清秋景不凡

盧巖觀瀑布東登封令

王洙

恠得高人勝地潛懷歸客子也須淹三生石上聞仙
樂百尺崖前看瀑簾過眼浮雲從漠漠映堦瑤草自
纖纖問君解組前來否塵世真能吏隱兼

宿少林寺

任惟賢都御史

數聲清磬度林霏琴鶴隨僧入翠微絕俗信無塵得
到開山真有錫曾飛青峰處處堪容隱白髮勞勞未
息機禪榻夜臨窻月卧覺來淡悟昔時非

登嵩嶽携程兒

王應鵬

秋郊蹇步信遲遲吏隱吾今兩得之天欲假年逢閏
月景當適意侍佳兒子長只了名山債老杜空遺亂
世詩閑處光陰應自惜野雲溪月未深知

登封尹侯安甫陪謁中嶽 王應鵬

令尹追陪樂事偕探幽攬秀亦吾儕山蟠平野寰間
少景到中天分外佳疊嶂籠雲連碧落叅林輝日接
丹崖十年來徃中州路此日投閒夙願諧

望少林

王應鵬

半日迴谿路始通僧家遙在翠微東目隨飛鳥依青

嶂心與浮雲入太空木落秋飈雙澗碧日銜西壁萬
山紅到門應看花臺月試問當年面壁功

嵩山

王尚綱

山西參政

丹峰黃葉淨秋顏鳩杖芒屨出舊關日脚已曛雙乳
洞月明先宿二熊山融融潁谷瞻雲外歷歷箕峰想
樹間獨向空巖慚病體誰將玉屑飯吾還

嵩嶽

蔡汝楠

東來伊洛訪名山二室峻嶒霄漢間石壁雲橫迷鳥
道嵩門月出見天關蛟龍吐霧晴嵐濕虎豹生風夕

草班萬歲峰頭瞻北極恍聞嵩祝動宸顏

遊少林寺

李乘雲

陝西參政

亂峰突兀問嵩林福地煙霞望處深石壁倚天清漠漠
漢女蘿懸霧碧陰陰落花風定栖禪影樵唱月明應
梵音獨坐悠然塵慮息不知身世有華簪

遊盧巖寺

徐南金

監察御史

岩巖高嶽與雲連攬勝尋幽洞壑邊古寺紆隨蒼徑
轉層崖直傍紫霄懸金鰲日映冰霜石珠縷空飛霹
靂泉獨憶高風唐諫議宛留眞蹟迹攀緣

少林寺次華原韻

李仁使

河南按察副

秋日名山初攬勝青蓮大士舊爲家
風林晝響千巖瀑繡嶺晴飛百道霞
寶相當天流佛日香雲繞座結曇華
空門誰解西來意爲問恒河幾許沙

遊少林

史褒善

河南布政使

偶因行部陟嵩岑暫駐肩輿訪少林
前代古碑蒼蘚合上方精舍白雲深
山腰雨過龍歸洞樹杪風清鳥弄音
一宿頓忘塵俗慮雅懷渾覺似禪心

石道喜雨

趙諫之

百嶮纔登磴坡溪雲四面起山阿原田喜足千家
雨野水新添數尺波即見青苗生秀色便聞赤子會
謳歌故鄉風土渾相似料得流亡起色多

磴坡

趙諫之

萬疊峰頭一徑穿亂雲無數水潺湲隨花好鳥啼春
晝帶雨農人開石田松菊久荒仍宦迹音書不斷自
常年孤舟遊客雙蓬鬢何日西洲釣晚天

登嵩山絕頂

溫如璋都御史

羊腸仄徑曉攀遊步入層霄山盡頭白鶴觀迎泉水

細高登崖轉洞雲浮海邊紅日孤
九上天際黃河一線流符籙漢封
無覓處佇看寰宇小中州

宿少林寺

劉紹恤

雲南按察僉事

萬峰疊疊漸峻嶒逕入轅轅興轉增
黃葉滿前猶作客白雲淡處且依僧
中原月度三更夜少室天開第一乘
試望高臺甘露色不妨重藉玉蓮燈

首歲寓登封

項璉

新年騎馬到登封遙望天門第幾重
曲坂三三通輦轂群峰六六秀芙蓉
吟看少室山頭雪卧聽嵩陽寺

裏鐘明日又從清潁去遠尋巢父舊遊蹤

登天中閣

周鑑

巡撫河南都御史

高閣凭虛萬仞顛四圍山色淨娟娟白雲時自封中
出玉鏡遙從象外懸曉日氤氳張彩幕秋風蕭瑟韻
冰絃飄飄爲問吹笙侶月下歸來不記年

登嵩嶽

穆文熙

考功員外郎

六十峰高望欲平何年神降甫申生形分二室盤中
土地接三川走上京惟道達磨能面壁傳來子晉解
吹笙逃空我欲成小隱未許盧鴻浪得名

五言排律

宿少林寺寄余何二分教兼呈松庭長老

山錫之

看山投晚寺緣徑入幽林蓮宇瞻弘敞龍宮聳鬱森
塔鈴傳梵語松吹響潮音雲起千巖白泉流萬壑深
天風飄靜院寶月印禪心翠閃山窺戶金輝閣映岑
蘚埋碑篆古花覆石幢陰愈覺真源迥何曾俗垢侵
迢遙懷勝景邂逅愜幽尋借衲依禪寂拈花啓笑吟
寄言分教客仙境幸同臨

遊嵩少

劉紹愜

河洛呈天瑞，嵩高協地靈。雲連平楚白，日擁萬峰青。
應宿中爲火，居方鎮是星。上公崇秩祀，貝闕儼儀形。
歷代陳圭壁，層巒列障屏。瑤函開寶籙，絳節引瑤輪。
客有吹笙嶺，僧留面壁亭。鶴能駢叱馭，石亦解談經。
玉井涵仙液，金壺注淨甍。丹砂因頌顯，青鳥應時停。
箕穎瓢無跡，浮丘洞自扃。栢猶稱漢將，槐更肇秦庭。
演法曾留偈，登封早勒銘。霓裳侵晚度，清梵夜深聽。
暮靄唵楓葉，朝霞覆茯苓。煙嵐晴裊裊，花雨晝冥冥。

月冷虛堂鉢風傳高閣鈴十年塵外想百念靜中寧
倏爾超三界悠然小四溟采真疑汗漫泛泛愧流萍

中嶽

唐順之

史巡撫都御

巫閭控北戶蔥嶺奠西隅茲地陰陽合中天洞壑孤
黃樞標正位紫氣護真圖近接浮丘宅深藏軒后符
疏峰連太乙列館象清都園宮猶漢築馳道尚秦除
肅肅泥書秘森森羽蓋趨仙遊微見迹帝幸暗聞呼
露洗千齡栢霜封九節蒲星榆臨砌發月英應時敷
將訪三山記猶迷七聖途今朝陪廣樂直擬到方壺

遊嵩山少林寺

唐順之

淨域龍巖上香臺驚嶺邊山由巨靈闢教以法王傳
二室圍蘭若三花接梵筵土中元此地檻外即諸天
複岫低衡岱迴軒寫澗漚雲衣披雜樹虹影度飛泉
綴牖皆青壁緣堤盡白蓮神猿參講幕馴鴿繞鑪煙
慧月秋逾徹泥珠夕更鮮谷將鐘迸響潭共鏡爭圓
萬劫終成幻三生併是緣願假金篦力一為照迷川

嵩陽宮栢

唐順之

嘉樹植崆峒年長勢更雄已無秦帝幸尚有漢皇封

幹比孤生竹根猶半死桐靈泉玉女灌甘雨嶽神通
葉密鶯難度枝樛葛易蒙垂陰九華帳弄影五雲宮
色掩重巖翠聲含衆竅風賓來虬蓋偃仙去鶴巢空
非因不材壽春秋自無窮

遊少林寺

穆文熙

海內稱名刹無如此地偏蓮華九頂出玉乳五峰連
甘露彌金界慈雲護梵天法輪西域轉象教震方傳
唐碣推神武秦槐飛斷煙齋心依靜土不是野狐禪
五言絕句

過崇福宮

李元

散步長松下時聞出世音
山泉煮山茗小啜洗塵心

遊嵩少二首

李元

聞道少林好百年欣此遊
金仙杳何處山頂白雲流

其二

境勝神自清魔輕睡難著
孤榻坐淡更天風語簷鐸

盧巖飛瀑

王尚綱

雲崖掛罽恩礪石橫玳瑁
晚霽試凭闌釣月明珠碎

早發粵嶺

趙諫之

鼓吹落微月旌旗映曉林竹溪山復靜一鳥送清音

再過粵嶺

趙諫之

秋草連天碧秋雲萬里長日西過粵嶺少室在蒼茫
七言絕句

少林寺僧話二首

喬宇

甘露臺邊秋月明偶逢曇彥話三生藜牀獨坐心如
水夜半空山有磬聲

其二

步入招提日未斜香臺片片落空花少林合是禪棲

地常有山僧誦法華

釣魚臺

何天衢

河南府知府歷尚書

臺前落日塞鴻哀
臺下西風潁水來
一曲滄浪秋寂寂
白雲紅葉好登臺

盧巖飛瀑

王尚絅

飛流曾向詩中覓
倒破今從畫裏看
不知雪浪高多少
能遣茅齋六月寒

少林雜詠

沈應乾

戶部郎中

疊疊層巒翠欲流
峰迴嶂轉跨中州
靈車霞佩杳然

去日斷飛雲天際頭

甘露臺前雷雨飛
碧巖突兀映煙扉
葛巾野服沾雲濕
疑是金牛頂上歸

少室縈廻太室西
松風蘿月近丹梯
攀緣欲探金明草
回首煙霞路又迷

亭亭御砦禪關北
兩兩龍泉虎澗西
雲霧叢中瞻佛榻
薜蘿密處聽猿啼

少林寺

趙震

三十六峰凌紫霞
白雲淡處有僧家
影搖絕壁菩提樹

樹香藹空門般若花

日晚憩少林二首

趙貞吉 大學士

崑崙東下海天迴翠疊嵐重二室開欲訪琳堂問仙
藥金童疑在碧雲隈

其二

東周鶴與洞簫回西竺人隨折蒂來塵世未逢浮海
筏青山空繞謫仙臺

同登封令汪君循嵩麓至盧巖二首

趙貞吉

秦槐漢栢瞰扶桑瀚海雲波歲月長獨有游人驚物
候六花飛盡又三陽

其二

雲蒸縹緲出蓬壺雪液嵌空噴玉珠幽棲高士不可
見悵望冥鴻天際孤

遊少林用趙內翰韻四首

今錄二首

楊洞

山僧午夢乍驚回報道高人勒馬來步入叢林最僻
處不知塵世有麟臺

其二

蒼茫海上扶桑禪
榻雲深夢正長
一枕青山天地晚
何妨松影轉斜陽

嵩書卷之十五終

門人

張魏三
孔樞

校字

嵩書卷之十六

韻始篇五

大明

萬曆年詩上

五言古詩

孫熙字令登封三年嵩高諸峰尚未識焉戲為

此嘲

李化龍

少傅兵部尚書

嵩高挿天中二室遙相向絕巘倚雲開幽壑臨虛壙
下有將軍栢偃蹇一何壯我為探奇來攀躋窮諸嶂
山靈如有嗔使君何孟浪此山有主者不識作何狀

出入頻戴星三載日無曠叢桂與寒巖可聞不可望
我爲山靈言若翁自高尚神可遊八極膏原羅萬象
五嶽五卷石四溟四潦漲么麼一嵩高安得屈似儻
嵩高不可屈其高信無上

由二祖菴登鍊魔臺眺望

周夢暘

河南提學副使

二祖巖旣奇鍊魔臺益矯石磴上盤雲曲徑羊腸遶
捫蘿陟其巔身入星辰表四壁勢削成巉巖礙飛鳥
把盃矚遠天翻覺神州小黃河崑崙來經過細如沼
亦有伊洛流茫茫一綫渺西華與東岱彷彿煙村杳

中多白玉膏服之輕且褻清晨如露溥飲此世絕少
我志愛餐霞坐待天將曉

少林寺

王士崧 刑部主事

嵩少夫何極中嶽名獨尊杖策千里外陁峴手自捫
竭來梵宇憩不數祗樹園古樹浮夕靄蒼翠明朝暎
形勢互迴薄週遭虎豹蹲雲霞麗丹闕日月夾層軒
佛燈燃長夜鐘聲時在門游絲靜不飛春鳥爭自喧
奇趣茲已窮洗心道亦存素衷諒有乎勝游竟難諼
卜築行拂衣無令孤願言

甘露臺

王士崧

振衣登層臺雲物互森爽縱睇臨空闊矚矚極泱泱
暄陽散長阡曙煙晴浩蕩白日麗平原碧草萋萋長
高情恣凌厲健步愜心賞遠目無近尋倏然祛俗想
猶憶甘露溥彷彿仙人掌仰身挹天瓢超超謝塵坱
法王寺

王士崧

訪勝屢回往寄興良不昶漠漠岫煙霏泠泠巖露泫
沾濡意已困憩頓聊所遣倚策玉柱峰歷覽信窮遠
連巖互參錯雲物森婉孌古剎制未頽高棟負絕巘

方池不盈咫洞徹足清淺采采金蓮花盈盈玉鑑展
紛吾塵滓隔心顏藉霑洗慷慨有淡衷從茲卸軒冕
遊嵩山四首

區大相

左中允調
南太僕丞

名嶽宅中土生賢借奇巘圖爲風雨會地以揖讓顯
崖巒雖峻極崗阜亦平衍憩麓果紆迴登崇更凌踐
夙多遺世踪到此塵慮遣箕穎信高蹈陽城道未貶
揆迹有絀伸忘懷任舒卷素風諒不遐幽意得所展
欲去還復留低回不能返

其二

尋真紫芝館訪古白雲衢年代一何杳輦道尚盤紆
秦槐餘一樹漢栢有三株金丹旣淪沒玉檢亦荒蕪
神仙術久閤多慾爲累愚千秋與萬歲無乃太矯誣

其三

薄遊吹笙嶺回憩擣衣石玉女不可遇青童似相識
遺我一廂藥金膏和玉液服之容色改自然生羽翼
體輕若黃鵠一舉凌八極顧視讓王人累累塚上石
天地可齊年浮名竟何得

其四

二室麗中天三花落雲外遠勢浮河洛穹標掩華岱
珍木自成陰瑤草何曾漑神膏沆瀣霏金砂碧潭碎
風從箕山來思與逸駕會天路杳難即霞術久蕪穢
獨見周王子吹笙遊鶴背青宮生塵埃紫房絕情愛
逍遙白雲間欲歸迷所在

山中贈丁元父給諫

時謫令登封

區大相

謫宦嵩山陽山溪意不俗巖扉時自開雲構何常卜
隱几見少室三花媚林麓簿書展長松印綬掛溪竹

山僧似定猿吏人偶馴鹿褰霞上高嶺採秀入幽谷
攬古將軍樹息蓋帝休木石泉夜雨聲數寸階苔綠
自關道氣清豈受塵網束正直神不欺幽閒理自足
時有箕穎人相過論心曲

登少室絕頂

區大相

二室俱造天少室難與侔將凌峯巒險遂涉清淺瀏
陰磴煙尚霏陽崖雨乍收曳曳雲觸石涓涓溪亂流
攀崖苔蘚滑踰嶺徑未修下窺元氣合上列象緯周
霞彩席間發嵐氣衣上浮彈琴衆山響吹萬群壑幽

方茲展奇眺聊用豁遠眸顧瞻盡河洛表裏見神州
海客談員嶠羽士慕丹丘茫昧理豈設想像步難留
平生徒欣仰即事恣冥搜寄言賞心客去此復何求

登箕山

區大相

杖策訪名山夙慕良有以素琴石上橫清風松下起
昔日讓王人含芬遺垢耻飲泉想棄瓢臨流思洗耳
太古多逸民中世寡奇士回策下巖翠放歌入煙紫
白雲何時來荒途誰與理終願畢吾志抗手謝空滓

城潁

區大相

停車指城潁芳躅何繽紛巢許旣高蹈千載離垢全
如何遺羨子純孝至今聞揖讓君臣全憤爭骨肉分
積憾天性蝕微言大義存至情在感發口舌徒云云
荒隧淪故道薄采奠孤墳寄言茅焦者潁谷有餘芬

潁陽道中贈登封燕明府 區大相

玉喬玉鳥飛方朔金門待久聞有仙吏思願與之會
君宦嵩山陽而與箕潁對案牘積煙霞訟庭落蒼翠
人吏青巖中簪紳白雲外有時驅馬出獨晤飲牛輩
雖復稍逢迎顧少風塵態乍到賞心愜久遊神理會

卧理時自閒撫字亦勞瘁洗耳未必賢折腰豈爲累
我尋五嶽期君報三年最何日丹砂成乘鸞謁華蓋
將游嵩少發偃師曉行田間

周傳誦

河南按察使

蚤起穿林薄零露濕人衣禾黍滿周原果實垂歲穰
驅車尋曲徑散蓋避低枝鳴蟬高樹發兩耳清風吹
青山若相呼白雲夙有期回首戒從人毋得田間馳
田間幾莖禾農家數口饑勿以游觀故而令向隅悲
問俗數憑軾野老對欷歔數載空皮骨茲庶免此離

但恐征求急不得救然眉殷勤慰野老努力畎畝爲
歲時有豐歉帝澤無偏私願告司牧者痼瘼尚念茲

同傳元鼎遊中嶽有序

高出

南京戶部郎中

盧氏去嵩山五百里往令多不至予實慕嵩兼甚
慕元鼎特往游焉遂與元鼎登其巔

嵩高自上古峻極造太清嵒嶮表天柱欬吸絕生成
三花發瑤檢露葉夾雲莖二室相橫亘揖讓若弟兄
決眼入三河他山皆硜硜登陟愜心期招攜兼友生
平生五嶽興茲也結初盟主賓在不負俱留千載名

悠悠一世人歷覽各含情相對盡為客偶爾感合并
飽聞前朝事萬乘擁霓旌秩祀隆百代壯哉帝王程
山川紀功德星辰揚光精牲璧久戒沒探策竟誰明
後世絕省方黎庶適無驚禮樂貴通變馨香惟利貞
四月旱頗甚茂宰憂如酲為君鼓薰風一為解愠鳴
神嶺白日蔽高閣丹霞平渺渺懷古仙登舉鴻毛輕
願隨浮丘伯雲中學吹笙

同元鼎遊盧巖寺

高出

盧巖嵩之坳崖根豁一半前賢所隱居跡為名勝冠

絮雲冒重岫光華常似旦飛泉闢流霞俯注含舒散
濤聲懸百尺碧與千頃亂琪花飄香雨紫螭穴空岸
石壁白日藏金沙明珠燦晤賞睠伊人道契同汗漫
朗詠大人歌超哉凌風翰孰令意不酬臨觴喟三歎

箕山

高出

箕山於太室如岱有梁甫輔嶽並稱尊他山遑敢侮
潁水源更清石流歷可數所以讓王人洗耳臨其澣
一瓢棄陶唐飲牛愧巢父後代鮮若儔高風激千古
緬懷睠有遇嗟哉不復覩惟見波湛湛雲氣朝如雨

褰裳行欲涉身上慙絰組孰云能曠覽徒羨翩翩羽
茲意諒自解來者將可補

贈別傅元鼎三首

有序

高出

盧氏之役予假公事入嵩者再矣己酉冬量移南
戶曹乃三入嵩山別元鼎共被信宿元鼎宴送天
中閣揮泣賦別不勝離群之感也時大饑當事者
憂礦寇為變擬調元鼎代予元鼎辭故末章及之
嵩高浮白日北風天地涼翳翳黃蓋峰執手臨其陽
晤笑一室內頃刻來蒼黃行子歸匹儔飛鳥廻且翔

馬嘶人無聲潁水不可航
吾子揚惠聞予其歸故鄉
路岐再三歎沾灑征衣裳

其二

衣裳柰天風伊洛揚廣瀾
贈我西方綺輕毳可禦寒
相思南國深采寄江之蘭
石上秀菖蒲可以助加餐
各慎千金體默默兩無言
志士聊慷慨且使崇令顏
其三

令顏誰不觀傾城入宮忌
樂哉爲新知猶恐傷憔悴
中夜忽忘寢思惟予同被
恩愛暫虧隔沒齒慎失墜

豈不念風波難爲他人媚與子相代治快亦千古事
北風雪霰零蒼然自酸鼻鴻鴈東南飛時寄一掬淚

登太室

穆光胤 中書舍人

平生有癖性好入名山遊方壺與員嶠杳冥不可求
晨起策三杖脩然望嵩丘仲冬野草枯高巖古木稠
穿雲惟樵徑赴壑有奔流野猿引我去超距衣自摳
迴杳千萬轉雨汗不能休飲澗飛虹斷駭人猛獸遁
伯昏無絕技若士有天遊齊梁分遠界伊闕來中州
天風黃鵠下白日蒼雲浮五色拾金草三花獻玉樓

振衣星漢落高呼帝座愁下界疑無地諸天接斗牛
元氣空中合嵐光望裏收晚燈遺野燒斜月半縣鉤
歸路煙霞滿回身係望周何當爲麋鹿日走北山頭
元鼎令君招同王義華戚不磷遊盧巖二首

崔萬仞

舉人字元

青山含素氣谷隱多眞賢聞昔盧徵君結菴太室前
策馬尋幽踪行行異山川林木悅我目流石契我偏
我我削峻壁泠泠掛飛泉萬事自陵谷舊地列諸天
吾友稱靜者歌吹列華筵客遊不知疲四座意悠然

感慨有餘情含語俱未宣我爲前致詞興盡且言旋
廢興自有數喧寂亦有緣冉冉下夕陽歸路聽潺湲
其二

人命如朝露舉世悞榮華徵君抱遠性日日臥雲霞
諫議非不貴等之若泥沙天子不能屈貞心誰可磨
嵩嶽高不極與爾共嵯峨茵茵二室下是處有煙蘿
誰能待婚嫁願此長婆娑何必求勾漏特地就丹砂
夏日同元鼎遊石淙過告成劉先輩叔姪見邀
飲觀星臺

崔萬仞

久雨暑氣薄聯翩出城隈縣令愛敬客冠蓋行趨陪
道逢衣帶士邀我登高臺高臺臨測景仰懷元聖才
荒荒衆山裏前階盡草萊他鄉如舊識傾意倒樽壘
情長苦日短倒景忽相催我行爲山川自勸覆餘盃

望嵩嶽寄傅元鼎明府

釋欽義

託身寄孤雲飄零慙飛藿生不羨榮名死只耽丘壑
曉發大梁城暮宿武關郭據牀望嵩陽截業隱林薄
清川寫幽谷浮嵐噴樹末揮手鳴瑤琴懷人發腦豁
倚杖冀王鳧延頸佇候鶴安得一携手舒嘯登嵩嶽

登嵩嶽四首

戚伯堅

布衣字不磷

夙昔秉微尚目欲覽八荒寄身菰蘆中窘步乖騰驤
聿來登嵩高浩若升混茫連山亘百里窈窕踰崇崗
崖傾不留趾石破馬足傷盤盤歷御道封禪思前王
天高氣爽清身遠目蒼黃窮陰懷萬壑珍木含群芳
列岫爭輔佐大小紛翱翔却立覽季室傍若右臂張
高情恣凌踐升險神肅將解纓濯天池醉倚仙臺傍
自覺非世人天風灑衣裳

其二

少室如蓮花一朶高插天低昂互分態開合左右連
石脊盤迂途渺若孤線懸猿獠爲之却况乃通人煙
天門壯崇墉俯睇伊洛川萬里豁遐矚兩戒分幅員
谷空答清嘯塵淨無鳴鳶忽逢浮丘子羽騎何踳蹏
手持相鶴經云與俗世傳捧讀再三歎茫然昧道詮
其三

朝攀萬歲峰暮躋定心石懷仙儻一遇雲開晃石室
三花燦戶牖日月影倒射別具壺中天五穀爛狼藉
中有白髮翁紅鑪煉靈液玉漿注瓊椀芳氣滿瑤席

一飲清肌骨再飲生羽翮
煙霞嬉遨遊體輕異疇昔
咄嗟住世人忽爲出世客
紫簫曲未終桑滄幾遷易
其四

夜永晦群景遠壁明璵璠
稍稍天地啓千峰延朝暾
爽氣散林籟雲英相吐吞
黃河落眼前萬里波濤奔
捫天摘白榆西笑卑崑崙
始知崇嵩高獨邁五嶽尊
山花異世植帝休蟠石根
食者捐妬性仁義草木存
垂老踐靈境久悲蟲處禪
王喬儻相招誓判骨肉恩

登嵩山

傅梅

太室似龍眠少室如鳳舞左右鬱相望維嶽重千古
往來凌其巔去天餘尺五顥氣連鴻濛煙塵隔下土
黃河一線明女几列睂宇洛邑鼎既沈梁園簡亦腐
中原興廢地蒼茫不可數予本曠放人偶然披紳組
雖爲世網櫻幸作名山主天池朝濯纓御砦暮陳俎
長風襲奔雲時常爭步武高峯采丹砂邃井采雲母
聊以遠穢濁非爲慕輕舉茲意難具陳四顧空延佇
滄溟與崦嵫日月自吞吐

中峯

清晨欣褰帷
息軌翠微路
捫蘿陟中峰
遠覽策高步
青天曠浩蕩
下界迷煙霧
不遇浮丘公
何能展心素

中天池

傅梅

嵩山神仙館
絕頂有天池
靈源應銀漢
砥柱命玄夷
玉漿任上薰
石髓受下滋
飲此可遐舉
不必求刀圭

逍遙峪

傅梅

奇陟追夙懷
靈山每獨往
遵巖過平峪
物境愜心賞
松頂霞飛松
根石瀨響
前賢迹已陳
徘徊空瞻仰

天門泉

傅梅

崇巘開天門，劃然湧清泉。濺拂雲根潤，圓折地寶宣。
度林平鋪練，逼漚細調弦。清游暢玄覽，一酌心瑩然。

石樓洞

傳梅

扶筇下崇椒，爰循芳麓遊。積嶂忽復啓，中有巖洞幽。
天然匪結構，麗名蘊石樓。寢憩煩勞釋，遺家欲終畱。

少陽河

傳梅

少陽峰下水，宛轉流成河。在山傳清瀨，出山揚素波。
芳樹蔭華渚，白鳥行青莎。欣此滄浪趣，不聞孺子歌。

石柱川

傳梅

雙石昂壁立中豁廣川流雨挾疊浪急風襲連淪稠
浦深堪垂釣岸曲詎容舟放游增浩歎逝者空悠悠
雲母井

傅梅

邃井倚崇丘幽襲坤元厚甘泉靡機引中間生雲母
寶韞每輝崖光揚時耀斗安得常服食歲與錢鏗久

織錦臺

傅梅

石臺啓石堂疊嶂隱層嶠石文如錦綺玄黃紛相錯
既無天孫機亦匪蜀江濯終古七裏文永言章名嶽
待仙峽

傅梅

少室如蓮華廣峽東方通崇巖與峻嶺刻削千仞隆
雲端啓碧洞真仙在其中身非生羽翰仰眺使心忡

搗帛石

傅梅

嶽頂一片石瑩潔平如砧玉女夜搗帛山中聞杵音
霞衣何用濯霓裳常如新天上無刀尺聲傳恐非真

拜馬澗

傅梅

王子本仙骨學道茲山中引轡出天閑揚鞭能追風
一旦忽冲舉畱馬表奇蹤澗邊群下拜馬亦化爲龍

東龍門

傅梅

少室伊闕回太室此間盡巍巍界中央配天雄作鎮
左右稱龍門禹跡曾兼濬地僻雲樹深茫茫誰復問
三臺山

傅梅

東龍門外山書中稱三臺維嶽資屏障雲物時往來
斷崖俄已失曲嶠忽復回漢皇巡行後輦路生荒苔
黃城

傅梅

箕陰潁水傍云是古黃城許由辭帝禪于此隱躬耕
棄瓢巖已古洗耳池猶清停轅弔遺址願言謝世榮
遊石羊闕外諸山遂窮玉谿之勝入夜遡潁而

歸走筆有述

傅梅

入山旭光迎出山明月迫山氣兩岸青一罅豁天白
衆水匯中流四望千層碧遠烟含細浪水天去咫尺
問津得漁郎溪入自決策清湍滌茂林冷然人境隔
閒雲時來往每抱山中石絕嶠立誰扶斷崖疑鬼坼
雙屐數滯停雨餘苔蘚積始窺貪幽奇久娛忘險窄
舍杖捫脩蘿縮縮驚魂魄歸路已更深官燭遙相逆
野人住巖阿夕火照空壁雞犬自成村駭見城中客
感此厭塵諠百念俱蕭瑟所欽古真隱終身樂山澤

小如斗鼠雀蠹魚無不有目中不復有金牛割然奏
刃庖丁手單父鳴琴不下堂中年雉雌遶車傍卓令
循良如魯令河陽詞賦勝漁陽三花樹下嘗留客二
室山中嘗布席秦槐漢栢盡停車禪宮道院皆題壁
讀君嵩吟數十篇篇篇俱似賦游仙座上每看雲舟
舳舻頭如聽水濺濺田郎風采人爭羨姓名先入蓬
萊殿璽書不久下登封天子傾心思召見清朝莫謂
諫書稀好取山龍補袞衣却笑當年彭澤令纔憶黃
花便賦歸

嵩陽宮作歌

高出

乾河礪礪山龍從四月天黃赤日風麥隴半枯蜻蜓
舞逢人復問嵩陽宮故基遺構不可覩惟有三栢鼎
樹摩蒼穹曲凹十圍深隱馬幹禿皮皴僵如虹半死
半生鬼神護倏東倏西日月通傳言漢封頗未辨唐
人之碑亦豐崇牧牛磨角龍篆沒蒼苔濯雨蟲書同
憶昔武帝巡幸日千乘萬騎鬱菁茵誰其聞者呼萬
歲荒唐信之終愚蒙卽論此宮金銀闕鸞鶴葳蕤三
花紅瑤殿翠華安在哉豈意於今蒿草叢三栢閱世

幾千載風霜屢入感慨中古今鐫題詩有篇其人往
往逐飛蓬嗚呼使我不悲嵩陽宮

登少室同傅元鼎戚不磷 穆光胤

昔覽五嶽圖名山稱嵩少拄杖未能臨徒買山靈笑
探奇今有嵩山長拉予欲踏青雲上御砦高盤天棧
開砮崖轉石愁偃仰主人閨中出絳綃數回宛轉各
纏腰前者攀援方汲引後者肩負復騰蹻鄧艾垂川
那可見分明千尺接引之猿猱天風忽送意飛揚疊
鼓鳴鑼雲麓傍餘音澗底驚雷起狐兔潛踪鶴鶴翔

聞道奇峰有六六排空一一刺人目若箇耕雲種紫
芝時走金牛與白鹿撲面蓮花片片開熊山大小逐
人來洛陽城郭還如故獨有東流去不迴搔首高吟
萬仞巔八極揮斥几席前眼看世界歸亭廡未許維
羅有大千當年李渤托高隱拾遺不拜甘匱齋太白
狂言索價高肉食不解翻成哂我欲名山老此身每
逢巖壑轉相親何時遁迹方山下巢許盧鴻好結鄰

移石幢

有序

穆光胤

元鼎旣建存古堂凡二室殘碑斷礎但有古人片

語隻字者悉出荆榛瓦礫中移集于此復另作一
齋官衙之右移戒壇石幢樹之齋前石幢唐物也
邀余與戚子飲其下余爲作歌

古壇敬側石無數慧日茫茫起煙霧石幢壁立幾千
秋苔碧土花空朝暮令君好奇未可儔移來獨置小
齋頭雕紋篆刻重磨洗金界靈文燭斗牛白鶴空歸
非華表香煙雲氣成繚繞夜來習靜魂夢清風幡自
定青山小

嵩高行

葉秉敬

河南提學
副使

嵩高壁立天中起卓絕眞人獨良止少室相從會好
朋大河環繞澄心水雲巒瓣瓣蓮花開瀑布霏霏塵
滓洗定後難搖八面風興來忽散千峰綺最憐平易
喜親人不作巉巖拒俗子一任塵凡日日過穿脇摩
肩如集蟻嵩高之量如天寬至人心事應爾耳

萬歲峰嵩呼行

葉秉敬

君不見嵩山無人寂無說萬歲傳呼驚欲絕誰識千
年峻極區都來一片廣長舌開脣剛只作三聲千載
茫茫舌似結祇今不語却如雷面壁磨翁得秘訣

嵩陽宮三柏歌

傅梅

突兀三柏挿天中碧鱗剝脫如蒼龍
抱雪凌霜鬪日月擎雲攫雨吼雷風
旁陰嵩陽一千畝爭雄二十四
高峰山中之人相傳聞漢武曾封三將軍
御蹕巡遊幾千載斷碑磨滅無完文
從幸諸臣知多少人人先此將軍老
隋唐戰骨久成灰矍鑠三君獨矯矯
人言不死是神仙子晉吹笙去不還
煮石蒸霞何地覓琪花瑤草空蒼烟
滄海桑田變朝暮種樹者誰今何處
閱盡遊人誰復來日見新墳高古墓
吾聞泰山有松

今未枯秦皇亦封五大夫後凋皆與山同壽片時虛
爵何爲乎政也徹也俱多事松栢兮蒙其汚我來
幸作名山主每過遺宮悲稷黍徘徊樹下不能歸有
懷欲向將軍語此間箕顙有天人敝屣曾輕萬乘主
况與衛霍同一流人奴齷齪何足數三君果受漢家
封萬古高風讓巢許

少室行

傅梅

鴻濛下墜元氣結巨靈劈天天柱折大禹安所施神
功五丁蜀道翻疑拙寒玉削成萬仞高森森畫戟排

天闕遊人多在側背行誰識此山真奇絕前日我從
臨汝來方知山面西南開百里巔峴看九頂蓮花一
朶誰爲栽四下群山低若水丹崖翠嶂凌波起韡韡
正如菡萏舒亭亭直上雲霄裏端整巍峩若冕旒宋
人所以稱冠子近山步步漸易形三十六峰插青冥
疑神駭鬼紛難狀吐霧吞霞了不停似獅似象似奔
馬如笏如几如張屏看山到此愜幽賞雙眼生饒雙
足癢脫却青袍著短衣捫蘿捥葛披榛莽絕嶠谿訝
斷忽連幽崖磥砢窄還廣同遊二客俱好奇穆君翩

翩戚君爽絳綃十丈代藍輿百夫更挽作前驅凌險
狎危賈勇進十里五里繞須臾麋鹿豺狼俱逃遁惟
有騰猿飛鳥相追呼絕頂振衣何所見石粼粼兮雲
片片京洛依稀幾縷烟黃河彷彿一條練西天門內
鐵窗遙玉膏神霧時時變帝休貝樹生何所萬壑千
巖目欲眩三定思過眼界空全山一副羅心胷向背
參差不必問根枝脉絡遙相通錦繡臺中猶爛熳光
明穴裏自玲瓏來仙靈隱群真府竇勝清涼列梵宮
龍從石笋暎瓊壁白鹿金牛堪共樞歌山舞水能娛

人昔日雲鐘聲未寂檀香紫薇原有種雲母丹砂亦可覓石室無主石床寒玉笈琅函空歷歷連天高接紫霄兮白道洞邊多白雲此間便好尋仙去緱嶺吹笙咫尺聞藥堂藥草多難識神芝甘果長芳芬一丈鍾乳千歲穀冥搜未遘西日曛二君勸我觀且止歸來黯澹思無已隱士惟知索價高縉紳絕無濟勝趾方今領畧屬何人揮毫一雪名山耻吁嗟乎樓异之賦二千言描畫色澤都且美後來楊奐十字詩分明寫出神共髓予懷正與昔賢同萬古山靈有知己

白鶴觀古松引

傅梅

嵩山之與多古樹幽巖深澗紛無數愛此突兀一老
松巍然獨秀仙人宮跨鶴之事若可信我來不見王
子晉惟有此松常閱人榮枯代謝春復春遠望亭亭
如車蓋風入松濤鳴天籟千仞盤桓眼界寬東西日
月飛雙九龍蟠虬蟄石罅裏震雷破嶽驚不起從來
神物難久羈如何不離此山垂我欲叱之乘雲走駕
我天池摘星斗白雲空繞故宮飛誰見白鶴復來歸
教人却憶丁令威

五言律詩

同滕北海管建初二山人暨幻休上人遊二祖

菴遇雨

黃洪憲

少詹事掌翰林院

迢遞青山暮峻嶒石磴斜孤雲生杖履細雨濕袈裟
古井餘雙栢煙嵐散五花何年謝軒冕此地學丹砂

遊達磨面壁洞

黃洪憲

躡屐上層岑千峰帶夕陰芙蓉青嶂合芳草白雲深
洞迴迷人徑壇空只梵音相看面壁處聊足洗煩襟

謁初祖

孫繼皋

吏部侍郎

雲開初祖殿清磬禮香筵座擁三花淨燈明幾葉禪
山屏圍積竊石室寫流泉欲問西來意天風為灑然

面壁洞

孫繼臯

一蓑何年渡千春此洞存身留片石現道與孤峰尊
曲磴陰雲入層崖古雪翻西來本無意吾對亦忘言

游少林寺

周夢暘

長日驅塵境今依梵帝筵栴檀風氣逆寶刹歲華偏
龍象諸天迴香花二室連未能拋世慮聊此一逃禪

少林寺夜坐待月

周夢暘

萬籟此俱寂空山星宿稀
挂林殘月吐入定一僧歸
岐路誰招隱風塵未息機
鄉思渾不減幾欲遂初衣
贈無言禪師住持少林二首

李言恭

臨淮侯

一衲孤雲外遙樓帝釋家
結茅依二室飛錫采三花
蓮是談經座杯爲泛海槎
予方迷彼岸肯爲指津涯
其二

有相皆爲幻無言始是真
爾能通大慧我欲悟前因
孤月懸心印三天轉法輪
達磨千載後面壁更何人

贈少林無言法師二首

宋世恩

西寧侯

道自西方至僧從上國來
繙經留二室演法駐三臺
錫掛嵩雲破杯浮海月
廻貝多何處樹到日幾花開
其二

鹿苑曾傳法龍宮暫說經
蓮花披寶藏貝葉啓珠扃
禪定方離日名高已應星
猶聞銅鈔在爲我訊山靈
謁嵩嶽廟

萬象春

巡撫山東
都御史

紫蓋開中嶽瑤宮逼上霄
四圍山拱伏萬仞壁岧嶢
神降傳周詠壇封侈漢朝
空庭瞻拜畢歸路隔笙簫

天中閣

萬象春

握衣上危閣一望思無窮地擁天中勝山標海內崇
煙光平入望雲樹遠連空對酒清歌發冷然欲御風
使大梁因遊少林寺

潘豫之

駐節且逃禪清涼此地偏雲濶孤磬濕寺古一燈縣
閱樹知僧臘鐫碑紀佛年媿非蓮社客空對遠公賢
三栢

李思孝

巡撫河南
都御史

翠律生崖表移根遂不群月陰千畝落風葉半空聞
比嶽將同壽為靈欲化雲作梁誇漢史何事號將軍

甘露臺

李思孝

曲徑經臺出齋心謁四禪
鳥鳴春欲盡林霽日初懸
忍草披香徑靈花覆法筵
願將甘露瑞遙祝聖人年

寄傅元鼎明府于嵩山

于若瀛

巡撫陝西
都御史

迢迢嶽色明君去宰瑤京
才豈嫌煩劇閒堪養性情
堂高雲不遠山近月偏明
怪得稱仙令時聞子晉笙

少林晚坐

區大相

山扉橫夕景石室吐晴煙
門對吹笙嶺窗臨洗耳泉
巖陰迴竹院香梵起花天
坐待浮丘鶴歸來松上眠

面壁洞同丁元父給諫

區大相

震旦初來日煙霞啓洞扉
苔生面壁石雲濕坐禪衣
五葉燈前度三花頂上飛
不知傳教後何事又西歸
題無言上人溪南精舍二首

區大相

一燈傳教後此地又開山
二室三花裏半峰萬木間
香臺携客上竹院待雲還
既了安心義何須長閉關
其二

居士住人天精廬水石邊
傍林開寶界持鉢酌香泉

花發傳燈後鳥歸鳴磬前
上方留客處松月共安禪
偕朱非二入少林至初祖洞

袁宏道

吏部郎中

宿世同來否青山記夢登雲分
新墜石樹老舊扶藤
古蘚番文印胡鬚壁影僧磨公
眞狡獪隻履去何曾
話無言上人方丈

袁宏道

杖子撥秋煙堂頭二十年還君
半面識乞我一蠡禪
石壁分窗看松風對榻眠
浮生成泛泛俱有雪毛懸
雨後登嵩山

張邦紀

右贊善

攀雲凌昊杳芳樹綠參差春盡花仍發雨餘山更奇
青童空碧草丹竈隱靈芝探勝懷高士煙霞洞口披
雪中同劉用貞孝廉訪無言禪師

楊玉潤

蘄州知州

寒日朔風急披裘向少林雪巖群玉合霜逕萬山深
豈謂探奇至還因訪道臨遠公會約今到虎溪尋
寄懷戚不磷于登封時客傳元鼎明府

馬之騏

翰林院編修

憶爾遊河洛翛然一劍從勝應窮少室重想托臨邛

尊酒堪誰共盤餐仗僕供轉嗔分手易空此惜萍踪
春分日送戚不磷重遊嵩少兼柬傅元鼎

王穉登

柳色綠於染折來重送君路從江便隔春與客同分
鴈度嵩山月猿吟少室雲到時花滿縣仙令共論文
龍潭

穆光胤

寺下澄潭靜不緣風雨驚披雲雙鷺起入夜九龍鳴
潁水分餘脉嵩陽助早耕安能當此際揮手試星精

紫雲洞

穆光胤

溪洞何年鑿清虛對石堂泉飛花片片雲起水茫茫
鍾乳仙人館紫芝白鹿鄉誰能當此地不遣世緣忘
嵩嶽詩二首

杜文煥副總兵官

山色碧嶙峋山形若鬼神佛圖金作像嶽廟玉爲人
獨鶴何年駐三花幾度春晚風吹几杖縹緲出松筠
其二

浮雲觸石低嶽色與天齊有穴通仙館無人狎隱棲
玉漿甘似酒石髓細如泥勝具吾真有何時一上躋
遊盧巖寺觀瀑布水率爾有作

魏大儒 蠡縣訓導

萬疊雲流處飛泉一道清風迴長練捲日射碎珠明
隔樹青天色環亭驟雨聲天然此真境夢想若爲情

少林寺二首

方承郁 南京兵部主事

一入轅轅嶺盤紆見少林白雲僧衲冷黃葉寺門深
果出菩提種泉飛梵唄音清涼靈境別最好滌煩襟
其二

五乳開初地高僧立雪年燈光熒碧漢香氣吐青蓮
藤結三花樹經傳六葉禪勞勞人世裏從此息塵緣

少林寺四首

傅梅

石磴接金繩，揆奇次第登。
野雲閒似吏，古柏禿如僧。
梵韻千林雨，禪心萬壑冰。
西來無一字，何處別三乘。

其二

山葉欲紅秋，山泉滿澗流。
叅禪知政拙，到寺覺心休。
塔影斜書漢，鐘聲晚咽樓。
伊蒲清供罷，欲去更淹留。

其三

日落萬山蒼，天風散晚涼。
開簾雲入座，倚屋樹成牆。
塵慮空花盡，清言漏水長。
青蓮何處是，飛唾口餘香。

其四

樹密畫長陰山雲白可尋
欹松寒抱石細溜遠穿林
香散真如地燈明不二心
遠公容入社誰復戀華簪
過鶯鳴澗懷高計部孩之 傅梅

褰帷省稼穡攬轡過林丘
黃鳥鳴高樹丹崖束衆流
幽懷聊獨往同氣阻相求
何日山陰道重來訪戴舟
漁樂坡 傅梅

倚巘編茅屋臨流繫釣船
已教山作主更以水爲天
閒網當風掛輕策選石眠
避秦疑此地莫向世人傳

存古堂

傅梅

披荆尋斷石，剝蘚列空堂。
鐘鼎千秋色，圖書四壁香。
靈開嵩室秘，奇類酉山藏。
流覽生遐想，前修詎可忘。

醉雨亭

傅梅

向日壺觴地，悠然見此亭。
兩年頭欲白，四野地重青。
命駕看禾黍，開筵問醪醕。
豐年真有瑞，不必獨爲醒。

渡潁水有感

傅梅

洗耳逃名位，高風自潁濱。
山川無定主，天地幾閒人。
逝水悲前代，浮雲歎此身。
褰裳歸未得，低首任紅塵。

盧巖寺看瀑布

傅梅

鳥道任躋攀，泉飛萬仞間。
亂流爭漱石，群籟欲聾山。
施食魚遊壑，翻經鶴守關。
乍臨人境外，長日飽潺湲。

客有獨登太室者問之

傅梅

聞君登太室，嗟我未能從。
陟嶽應千仞，穿雲約幾重。
有無菴控鶴，多少穴藏龍。
石室曾誰遇，歸聞何處鐘。

秋雨初霽率爾登山有作

傅梅

秋日山行好，秋山雨乍晴。
有巖皆作瀑，無水不成聲。
墜葉沾衣潤，飛雲拂蓋輕。
歸途天欲暝，灼灼片霞明。

七言律詩

登中嶽

李化龍

少傅兵部尚書

獨步嵩峰最上頭，憑凌萬里見高秋。
西連紫塞千山出，東指黃河一線流。
漢時秦封何處所，盧巖許嶺自清幽。
登臨頓失風塵色，極目浮雲澹不收。

嵩陽宮

李化龍

懸崖壞壁草芄芄，傳是嵩陽舊日宮。
何處閒雲飛嶺外，有時佳氣起封中。
螭紋剝落唐碑古，虬樹陰森漢栢雄。
指點千年成感慨，悲風蕭颯萬山空。

天中閣

李化龍

橫天飛閣俯神州
漠漠中原此上游
地轉三河紛秀色
窗開八極起涼颼
峰頭夜聽玄猿哭
檻外朝看白鹿遊
回首漳川何處是
仲宣無賴賦登樓

少林寺

張維新陝西布政使

躡屐名山若有期
秋霖忽霽萬峰奇
慈雲初結曇花蕊
甘露低垂祇樹枝
上界鐘鳴僧定後
西山日落鳥歸時
一塵不到禪關掩
何處風翻貝葉辭

少林寺

馬化龍天津兵備副使

維嶽會聞六十峰偶依禪室寄閒蹤諸天鐘磬穿雲
度萬壑煙霞拂檻濃古栢森森標漢跡高槐矗矗識
秦封撚燈欲問西來偈尚逐塵緣未許從

登嵩山禱祠夜宿少林值雪志喜

徐申 南京通政使

中嶽曾聞漢代封諸天秀色攬群峰千年玉檢藏靈
瑣萬壑松濤雜暮鐘弭節三川如可抱振衣二室若
相從喜看瑞雪垂垂合回首巖巒吐玉龍

遊中嶽

丁應泰

兵部職方主事

謫籍天中吏事閒扶藜名嶽幾飛攀昔聞武帝鸞輿
至晚待浮丘鶴馭還隔嶺春雲分二室垂巖寒瀑響
千山遲迴獨立嵩呼地青瑣猶然憶舊班

遊少林寺

丁應泰

青山空曲地清嘉紺殿中藏帝釋家祇苑禪枝開五
葉珠林仙樹採三花天空池水沈孤月日射爐煙結
彩霞直悟一乘窺最上何須重問白牛車

登太室

俞安期

布衣字美長

石室逶迤石徑通艱危雙履出龍從峰懸午日天中

定河引春流洛浦同雷動呼聲傳武帝雲扶鶴駕望
仙翁神漿更在三臺上乘月思過玉女宮

登少室

俞安期

嵩高中斷並神丘杖底泉開潁水流低度嵐陰連太
室遠分山色繞中州掛衣春樹三花滿擁幔晴雲五
彩浮遙傍星樓天半宿少微未夜在峰頭

題少林寺

方大美

太僕寺少卿

余自乘驄度石關少林野寺枕嵩山臺承甘露禪牀
淨樹擁慈雲客舍閒萬象不離生戒外諸天多在有

無間達磨面壁西歸後誰讀楞嚴解八還

遊嵩少酌廬巖同燕明府

黃輝

少詹事兼侍讀學士

太室少室蓮花巾大熊小熊巢父鄰喜從黃社遭賢
令笑共青山閱過人茶竈煮來秋月苦芝藍提去夕
陽貧廬巖已不知鴻一名姓何勞着片珉

二祖菴在鉢盂峰同秦京作

黃輝

澗響藤枝百折秋萬峰荒翠鉢盂收轆轤鳥跡空中
下河洛龍光天外流石怒亂隨獅子擲塔靈高許鴈

王投眼看浩劫長如此誰道真僧有去留

嵩陽院觀漢封三栢

區大相

嵩陽宮外栢三株漢帝遺封今記無翠靄尚留龍馭
遠青天時有鶴群呼年深飽歷風霜色世渺全荒玉
檢符欲問興亡千載事不知人代幾榮枯

遊少林值雨

區大相

清晝入門春霧濃坐深簷溜遞疎鐘泉聲欲過三花
樹雲氣常生二室峰入夜蕭條清客夢翻堦滴瀝滯
遊踪明朝擬趁嵩高目好放晴光隨杖龍

謁中嶽

李思孝

峻嶒神嶽拔千尋
曉望空濛瑞靄侵
松檜曲連天路遠
風雲高護古祠深
百王秩祀昭靈貺
八郡災祥見帝心
祭戟暫停瞻禮切
瘡痍滿目罷登臨

遊少林寺贈無言上人

張邦紀

琳宮萃律據高峰
禮佛遙聞樹杪鐘
古殿拂雲巢燕雀
蒼松蟠蓋偃虬龍
譚經法座天花密
入定幽巖霧靄封
願待向平婚嫁畢
遠公蓮社合相容

題達磨面壁

金忠士

河南巡按御史

渡江一葦浪花飛九載跣趺坐翠微面壁已知僧入
定巢肩亦是鳥忘機無生色相俱成幻有漏人天總
悟非何事宋雲蔥嶺見少林風雨悵西歸

望少林

曾用升

河南巡按御史

群峰擁翠自芊芊靈鷲飛來不記年縹緲浮屠參碧
落微茫曇樹隔蒼煙探奇業負三花勝問俗心懸匹
馬前欲起瘡痍渾未得忍將遊豫漫流連

登太室絕頂

山行二十餘里覓古今人題壁不
得一字欲窮天泉石樓之勝而壞

祠無可栖止者
嵩遊之廢久矣

袁宏道

礫瓦紛紛雨洗斑
嵩峰久矣閉仙關
雲開忽見玲瓏壁
水外微鋪淡遠山
古道熟知龍洞嶮
僧云勝在石樓間
幽巖欲去無栖處
獵火燒空照夜還

觀盧巖寺瀑布二首同朱非二傅元鼎

袁宏道

百尺煙中紫翠分
水光搖日雪紛紛
長風碎曳千年石
飛雨斜侵半壁雲
澗底有人穿洞出
山間投礫隔村聞
仙家只在溪嵐裏
松腹猶存鳥篆文

其二

洞門長是帶雲關竹杖淡穿杳靄閒醉裏放杯眠澗
水夢中和雨入廬山霞光射壁殘碑出松影流塔處
士還潭下老龍呼不起携將新月過煙鬟

贈登封令傅元鼎

嵩山之奧有白鶴觀遺址偃蓋松一株亭亭可愛元鼎圖

復此地故未句及之

袁宏道

麈尾一麾案牘稀石淙潭水洗秋衣公庭葉落書常
滿絕壁雲開鳥自飛入寺每同來薜躋上山親與勘
松園夢中白鶴如相語君是重來丁令威

嵩陽宮古栢封于漢非漢物也傅元鼎以爲三

代時物信然

袁宏道

看窮人代只青蔥山鬼那能記始終手把洛書逢大
禹眼窺日表見周公龍鱗扶石方知地鵬翮搏天始
送風縱始文成能誑語問渠霞壁幾時紅

宿少林寺

房楠
工部郎中

纔過空門性自閒松風寂歷鳥間關得逢金鏡蓮生
火但解天弢簣即山香渡窻虛秋桂發韻從天外暮
鐘還更闌拾履層階上雲淡波澄月一彎

謁中嶽廟

吳用先
浙江左布政使

嵩陽宮殿倚雲隈
六六峰頭秀色來
遶郭層巒螺髻
列插天群嶂
錦屏開蒼松翠栢
煙凝樹玉笈金函
霧鎖苔縹緲
洞簫丹鳳下
誰言塵世隔蓬萊

會善寺示傳元鼎年丈

時修嵩書

吳用先

香臺古刹冷遙岑
捫石穿榛恣討尋
刮盡豐碑荒草
沒蝕殘斷礎臥雲
淡菟羅詞翰堪追雅
收拾煙霞足賞心
欲拂瑤琴山水奏
况逢同調有知音

太室

黃承玄

河南右布政使

萬疊長巒臥紫煙幾朝名刹倚諸天
嵩門曉控真人鶴玉柱晴飛太乙泉
綠字碑函唐禪日蒼崖樹老漢封年
捫蘿若遇浮丘子便欲餐霞薄世緣

少室

黃承玄

携筇何處問三花望入層嵐路不賒
雨過半空懸石髓雲消九頂見蓮華
珠林月挂神光錫玉洞丹留子晉砂
極目更憐殘照裏群峰片片倚青霞

少林寺

周傳誦

河南按察使

目極嵩高幾十年暫從野衲了山緣
峰回五乳臨初

地雨挹三花淨法筵面壁人亡空說影安心語竟別
無禪諸天不染風塵色坐看藤蘿月正圓

石淙

周傳誦

山中到處可彌留一壑誰知此地幽磴道天開石筍
出奔濤雪捲浪花浮遙分嵩少千峰色絕勝陂塘五
月秋解綬抽簪茲未得暫將清興托滄洲

少林寺夜坐

鄭振先 禮部主事

一到靈山意嗒然那知淨念亦因緣識神纔起微塵
滿聲臭全銷萬用圓不向眼前尋實地更從何處契

先天旁參漫自勞終夜道力初持恨未堅

遊少林寺

王元翰
工科給事中

跏趺大士背巖扉草樹離離佛日輝面壁幾年能透
石渡江片葦爲傳衣三花香散飛黃葉五乳峰高上
翠微夜半風鳴幡影動誰知隻履未西歸

同傳元鼎明府謁中嶽飲黃中樓得門字

張季彥
兵部主事

巔岼嶽色散朝暎二十四峰此獨尊時有黃雲浮紺
殿俄聞清磬度松門空堦剝落螭文古斷碣模糊鳥

跡存醉倚危樓舒遠眺亂山積霧鎖黃昏

中嶽別傳元鼎二首

高出

三載頻看二室松風塵杖履那相從翠巖石隱前賢
跡黃蓋雲生歷代封雪樹迴懸平樂澗雨花遙落少
林鐘異時箕穎還相憶悵望中原六十峰

其二

勞勞行色笑遷官積素蒼茫紫氣寒地主若爲愁判
袂山靈真欲惱彈冠鴻途千里從茲遠馬首群峰不
好看西北浮雲休苦望相思頻折穎陰蘭

遊少林寺宿無言上人精舍同戚不磷四首

馮時可 雲南參議

大乘神州氣鬱蔥琳宮梵闕倚龍從青蓮爭護傳燈
影瑤草淡依立雪踪千澗玉流塵自洗諸峰龍抱秀
偏鍾誰人能解西來意不羨緱山笙鶴逢

其二

杖屨高標物表風誰知身世在天中鳥喧叢薄山偏
靜雲撥虛堂境自空嶺外河流今古白林間葉醉淺
淡紅唐碑漢碣終磨滅惟有禪心萬劫通

其三

河洛離宮久已淪禪林獨揭典型存虹梁霧閣臨仙
壑月榭霜臺通帝閭二室近攀稱伯仲群峰遙拱作
兒孫悠然清舉塵情斷一榻松風警夢魂

其四

名境精藍七寶房淋漓雲氣和天香千年樹與碑俱
古百轉峰將壑並藏僧指翠微標勝蹟客磨蒼蘚覓
鴻章無論問法傳心事只此幽居興亦長

嵩山雜詠四首

馮時可

萬古宅開萬國中兩山鎮壓兩河雄
龍眠鳳舞奇形別玉積蓮苞秀色同
雲氣往來常自接天門呼吸近能通
仙源有路誰招引八翼冷然好馭風

其二

仙關淡渺閉綢繆萬仞崔巍勢獨尊
水外飛霞銜御砦巖頭垂瀑震天門
光浮玉鏡常懸月墨灑金壺未滅痕
安得青童遂相引剛飈吹翼薄崑崙

其三

鬼谷龍潭蔽草叢獨餘古色似鴻濛
四封嶽瀆環爲

輔九野星辰拱此中雲裏雙笙仙下上嶺頭隻履佛
西東幽奇欲討無栖處他日重來捫大熊

其四

蒼然嶽色壓天中陰壑陽崖望不同遠水如雲浮落
日飛泉似雪舞回風石牀夢醒群魔伏金地心開萬
境空誰可入林相把臂朗公今在玉溪東

令君傳元鼎邀遊上盧巖嵐寒逼人令小史酒
余醉且二三寒氣若失喜而有作蓋余不食酒
數年矣

馮時可

徵士幽居建佛菴到此不飲樂寧耽
敵嵐三酌聖能中對瀑連觴禪可參
小史紅顏堪引滿令君青眼易成酣
松陰山翠煩雲護他日飛鳬再試探

寄贈元鼎世丈于嵩陽

馬之騏

翰林編修

使君有子更雄飛載剖單符出帝畿
文筆東京推伯仲治聲西漢共光輝
窺簾一鶴乘雲入拂席三花帶雨霏
早晚若聞天上召瑣垣清切嗣前徽

寄贈傅元鼎明府

馬之駿

戶部主事

三臺春暖沸絃歌縹緲瑤笙鳥影過
勝蹟每先猿鶴

到新篇翻比簿書多捲簾石髓青常滴推案雲峰翠
不磨解識遊仙兼吏隱風流輸爾獨婆娑

寄答元鼎世兄

馬之駿

懷人嵩少鬱千盤交定翻憐識面難課吏林田常共
客尋僧芒屨不知官書成字肯懸金易政暇琴唯閉
閣彈可是君家饒治譜桐鄉今已祝衣冠

夏日元鼎招飲天咫樓

樓在登封北城門上乃元鼎創建者

崔萬仞

舉人

新構高樓欲近天青山一帶供華筵太室少室綺疏

外小熊大熊朱檻前始信向來詩有畫試看今日令
如仙探奇何地宜先發笑指石淙月滿川

訪登封傅元鼎明府

穆光胤

中書舍人

縹緲嵩雲近帝居此中仙令定何如栽花赤縣聲堪
埒種秫公田政有餘馬上看山神色爽巖頭覓句禮
文疎因君動我煙霞癖回首應焚學士魚

寓登封贈傅元鼎明府

戚伯堅

布衣字不磷

白鹿青童久寂寥美人為政擅風騷名隨伊潁流俱

遠身主嵩陽望並高問俗閭閻無逸事題崖靈怪助
揮毫三花即是甘棠樹父老春秋瀉翠濤

石淙

戚伯堅

境外尋真境亦真空山雨洗壁痕新怒流亂射泉千
鐫砥石中蹲座百人花罨綺筵張繡幕草浹碧澗走
朱鱗幽巖若可添茅屋臥聽松風老此身

登嵩山

白南金

塵俗難分半日閒嵩高今始一躋攀黃河影接中天
上玉壁光搖二室間聽講龍來曾入座吹笙人去幾

登山峰頭六十多仙藥何處丹砂可駐顏

登測景臺

葉秉敬

河南提學副使

朝出陽城霧色籠登臺如夢見周公臨高洞識陰陽
會測景全看天地中二室雲開花爛熳千畦泉繞玉
玲瓏前旌指點石淙路馬首徘徊未忍東

偕傳元鼎遊石淙望潭而飲尚欲添一斗牛槎
也遂成一律

葉秉敬

驅車未到已聞聲隱耳輕雷笑不驚石湧參差人坐
立潭開瑩徹鑑空平徐風入澗迴環轉曲水浮觴委

宛行欲借傳君舟楫用不教河漢隔盈盈

登嵩山二首

方承郁

南京兵部主事

宛轉丹梯歷幾重削成二十四芙蓉秋聲不斷天中
雨朔氣疑吹澗底鐘突兀岡頻空翠染叅差碑半古
苔封興來直借浮丘鶴爲上嵩高第一峰

其二

遙遙空際畫陰冥爲愛名山選勝停帝遣五丁丹嶂
擘道迷七聖白雲扃何年玉笥藏金簡自古祈靈有
勒銘休問前朝封禪事官亭寂寞石花青

抵登封東傅元鼎明府時元鼎先遣吏候予于
輶轅
方承郁

曾從玉井掩雙扉更向嵩陽一振衣候吏徒勞望紫
氣美人真自拂金徽停輶朗月秋空淨入郭薰風朔
色微指點群峰青不斷願期仙舄與同飛

望子晉峰

王孫昌
舉人

不二門開第一山少陽東去水潺潺峰懸五乳中天
下磴歷千盤出世間面壁空畱石影在吹笙不見鶴
飛還稔聞九頂蓮花砦白玉膏吞可駐顏

遊達磨洞

陳文燭大理寺卿

岩巖葱嶺萬重雲策杖登臨日欲曛五乳高峰人不
到九年空影石爲群寶光尚映遺碑字梵宇偏從古
樹聞況是友人能解脫夜淡還檢釋迦文

寄題中嶽

余少有五嶽之志不幸牽於世網並未得遊萬曆壬午以計吏北上途中

偶爾興懷寄託

屠隆禮部主事

高柱剡天白日停千峰迴合畫冥冥鶴乘秋日笙俱
冷虎嘯空巖殿不扃一夕風雷松壑徙九年霜雪石
花青竦身欲挂藤蘿外夜聽金臺玉笥經

寄題嵩山二室二首

王履和

字仲美邢臺庠生

太室

噴岈萬仞倚晴空只赤人間路不同誰遣巨靈開鳥
道翻從勝槩弔雄風憑凌星斗三千外指顧河山百
二通大地茫茫看一氣不知何處問鴻濛

少室

九頂蓮華葉葉分旭光一抹淨塵氛洛川風起晴飛
雨崑嶺烟封曉度雲萬壑鐘聲通窈窕千秋劍氣吐
氤氲漢唐御蹕從何識古木蕭蕭鳥自群

太室

傅梅

凌極名山稱地主振衣二十四峰高遙看海日生朝
曙下見河流捲暮濤古寺空傳龍送水仙壇猶有鶴
鳴皋自從漢武登封後多少盤遊置驛勞

少室

傅梅

西嶺天風送鴈羣凌虛千仞入綢繆茫茫貝樹三花
落面面蓮華九頂分倚杖漸生梁苑月沾衣幾度洛
川雲可憐緱氏笙音斷十八疊中何處聞

箕山

傅梅

嵩南特立如嵩輔萬古箕山祀許由異世猶傳高隱
蹟當年肯代放勳憂川原寂歷青天暮煙霧蒼茫碧
樹秋拜墓自慙紳冕俗孤峰徙倚思悠悠

潁水

傅梅

耿山之麓潁源長東過箕山正渺茫我欲開渠成鄴
下誰同游樂比濠梁中流沉沉桃花色兩岸依依杜
若香洗耳挂瓢何處是可能懷古不懷鄉

陽城

傅梅

自從大禹避陽城曆數于今幾代更河洛尚存千載

蹟謳歌想見萬方情微茫玉帛荒祠暮寂寞舟車古道平故址不堪搔首望高原惟有野人耕

輓轅

傅梅

橫看一嶺側千峰鑿石爲關路幾重遠帶河流歸上國平連伊闕列崇墉若令方軌應難度即用九泥亦可封欲向此間占紫氣晨昏好聽少林鐘

廬巖

傅梅

疊嶂懸崖勢欲傾千尋瀑水落縱橫直穿嵩嶽春雲色常作瀟湘夜雨聲幽洞涼生松影合虛亭塵靜竹

風輕高賢舊宅今爲寺弔古今人減宦情

石淙

傅梅

行春選勝列春筵箕北嵩南此地偏淺溜深潭清自
入奇峰平嶂曲相連林惟花草疑無路洞鎖煙霞別
有天不分尋常修禊事千秋獨紀永和年

過少林寺二首

傅梅

二室巔岼一徑通少林寺在翠微中地從梁魏標靈
異僧自隋唐好武功若道傳衣終箸相須知遺履亦
非空年來悟得西方旨才到名山便不同

其二

禪堂寂寂坐更深月上松杉見遠岑地迴樓臺收翠
靄山空鐘磬有清音官閒自合無生法政拙還同不
住心三十六峰多藥草何時解綬任幽尋

春日自嵩入洛四首

傅梅

黃昏昨命嵩山駕清旦今浮洛浦舟千里悠悠成浪
跡一官落落寄深愁新杏爭相媚閒水閒雲好
自由無奈歲荒歸未得豈因五斗斲淹留

其二

白雲青蓋共飄揚滿路鶯花斷客腸拚以忙官消歲月那堪遊子度春陽邛山洛水渾無異金谷銅駝盡已荒弔古傷今情未已故園書問復茫茫

其三

遠浦微茫接遠岑輕雲輕霧晚陰陰驅車豈敢悲勞役束帶惟愁損壯心花到春殘應棄葉鳥知天暝亦歸林幾回擬作褰衣遁滿目瘡痍軫念深

其四

河汝鄰邦同駐驂謁臺大會古周南論官我亦稱民

社量地誰還視子男政拙已知無上考時違爭敢縱
溪談一行作吏傷心甚豈獨愁生七不堪

陪方伯黃公山遊

傅梅

新秋榮戟下烟嵐六十名峰次第揆身立天中見天
外路經山北到山南諸方寶樹供揮麈四野甘棠識
駐驂下吏祇應前負弩叨陪醺賞挹清談

陪憲長周公山遊

傅梅

中原山水嵩爲勝憲節今逢按部來白晝微雲開二
室清秋皓月照三臺旌旗色與林光合鼓吹聲隨澗

響迴聞道霜威凌草木陽春三日感趨陪

登嵩八首

有引

傅梅

予至登封三月後始草草遊觀作太室少室
箕山潁水陽城轅轅盧巖石淙近體八章詞
無足采而住持道公伐石八條刻少林寺好
筆者搨去有製作屏風者予見之甚愧恐不
足爲茲山重也異日見岱史李于田先生督
學山東時有登岱八律後來和者往往如其
數雖工拙不同亦豪舉也因思嵩何遜岱此

段公案似不可缺遂爾效顰不知果足並傳
否時予束裝將上計矣即用以畱別山靈可
乎

四野耕桑吏事閒蒿高咫尺任躋攀半空煙霧憑凌
過中夏封疆指顧間河水明明吞洛水箕山隱隱接
塗山坐看暝色千林寂月印天池未擬還

其二

煙消雲淨轉嵯峨搔首青天發浩歌山以鴈行分二
室地從鱗次辨三河瑤空風起身堪御銀漢星回手

可摩萬壑千巖涼似水石樓無主奈愁何

其三

天雞纔唱見朝暎此地先明下界昏霞彩千重生御
砦泉光百道挂天門玉華玉柱遙相接金匱金壺盡
可捫潁水若如星宿海中原亦自有崑崙

其四

丹崖翠嶂倚晴空呼吸還疑帝座通至北至南均日
景交風交雨列天中高含元氣三台近分奠坤維四
嶽同豈爲山呼崇祀典虞廷柴望已無窮

其五

雲棧星梯度幾重
石林選石臥孤筇
紅塵壙垠三千界
碧落巔巔六十峯
太乙祠前松鬱鬱
天封觀外水溶溶
豪華轉盻成今古
欲問浮丘不可逢

其六

空中九頂似蓮花
天際峨嵋未足誇
百里蔽虧藏日月
四時光怪幻雲霞
玉膏石髓神仙饌
金界珠林帝釋家
綰綬此間真吏隱
何須句漏覓丹砂

其七

宛轉羊腸十八盤中峯峻極入雲端九潭下瞰蛟龍
宅五渡遙成鴈鷺灘白日忽沈梁苑暮蒼煙不斷洛
宮寒徵書自是前朝事巖穴重尋大隱難

其八

憑將勝具縱幽尋臘屐穿山溪更深峰有奇文傳灑
墨泉多妙響號鳴琴琪花瑤草無冬夏白鶴玄龜自
古今邑小官閒聊寄傲淹留五載未抽簪

門人

焦弘祚
陳懋齡校字

嵩書卷之十六終